

*Pa falta di interes di su miembronan***Sindicato Simar ta pasando den un crisis interno**

ORANJESTAD – Actualmente Sindicato di Maestro di Aruba (Simar) ta den un crisis interno pa mantene e interes di su miembronan bibo y asina garantisá e existencia di e sindicato mes.

Actualmente nan tin un directiva cu ta funcionando cu e cantidad mínimo di miembro, cu ta 5 (di un total di 9), segun nan statuto. Un di nan a pidi su retiro oficialmente. Pero tambe tin algun miembro di e directiva cu a vocifera cu posiblemente nan lo tin pensa di entrega nan retiro tambe.

Preocupacion

Presidente di Simar Sheila Lazo-Tromp ta sinti cu tin miembronan di e directiva cu kier continua, pero ta existi cierto factor cu ta hunga un rol den e decision aki. E ta haya cu si tin mas miembro cu ta expresa deseo di retira, e ta un situacion “un tiki alarmante” pa e bon funcionamiento di e sindicato aki.

“Si bo no ta haya personanan pa yena e vacatura, bo ta puntra kico ta bay para cu Simar”, asina sra. Lazo-Tromp a declara na Bon Dia Aruba. Encuanto si Simar ta muriendo, presidente di Simar a bisa cu e situacion interno di e organisacion sindical ta keda un preocupacion, si nan ta wak e cantidad di docentenan cu ta bayendo cu pensioen.

Miembronan

Simar ta un sindicato cu a caba di cumpli 45 añadi di existencia. Nan tin algo mas cu 300 miembro activo y tambe nan tin miembronan honorario cu ta e pensionadonan cu no ta contribui cu e fondo pa Simar.

Actualmente nan tin hopi mas cu ta bayendo cu pensioen y menos ta drenta di un cuerpo di docente di mas cu 600 maestro na Aruba. Pues e ta un cuerpo di docente hopi grandi, pero cu tiki ta weita e esencia y importancia di un sindicato, y tambe e hecho di pertenece na un sindicato.

E ta haya cu varios factor por hunga un rol, caminda e generacion nobo di docente no ta haya importante pa afiliá na Simar.

Un di nan ta e tendencia di mescla política cu sindicato.



Naturalmente como sindicato nan tin cu boga pa e interes di nan miembronan, ora cu nan sinta na mesa di negociacion cu gobierno. Pero no mester lubida cu sindicato ta representa su miembronan legalmente, ora cu algo no ta bay na su favor den nan trabou.

E hecho cu varios aña pasa a denuncia cu tabatin malversacion den e fondo cu Simar ta maneha, e ta un situacion cu tin biaha ta crea un ambiente di falta di confianza. Pero segun presidente di Simar e directiva no ta permanente, ya cu tin directiva nobo cu ta bini cu ideanan nobo.

Otro factor negativo cu por hunga un rol ta cu un cierto informacion no corecto ta bay afo di e casonan. Tin biaha e hende ta bin cu un conclusion a base di loke nan a tende y no a base di berdad.

Miembro nobo

A pesar cu nan a yega di haci presentacion riba peticion y riba nan propio iniciativa, sra.

Lazo-Tromp ta pensa cu kisas e docente no ta suficiente informa di kico ta e trabou di sindicato. P'esey nan no ta haya e importancia di pertenece na e sindicato. Nan ta trahando cu e grupo di IPA cu ta bay caba, pa Simar mustrá e docentenan nobo kico Simar su importancia ta.

Ultimamente Simar a ripara cu miembronan nobo a drenta pasobra nan a confronta un problema na trabou. E ora ey nan ta corda cu ta existi un sindicato cu por sali na nan favor.

E ta un situacion fastioso, ya cu e miembronan tin cu contribui cu e fondo pa asina Simar por paga un asesoria juridico pa e miembro. Pero e persona aki nunca a contribui cu e fondo, pero manera cu

nan ta wordo acepta pa bira miembro, e sindicato mester sali na nan favor.

Ademas Simar tin su gastonan di su propio edificio, trahadonan y gasto di operacion diario cu mester cubri. Esaki ta parti di e preocupacion cu e directiva actual di Simar tin.

“Bo mester di miembro y no ta solamente ora cu bo tin un problema e ora bo tin cu corda cu tin un sindicato”, el a bisa. Actualmente e situacion di Simar ta sinta tambe si e cuerpo jong no ta dispuesto pa sali dilanti y compromete nan mes activamente cu e actividadnan di e sindicato.

Presidente di Simar ta recorda su miembronan cu e “directiva cu t'ey, nan ta bo bos. Si bo no t'ey nunca pa resona bo bos pa bin cu bo idea dilanti, nos no sa kico bo kier of kico ta miho.” □